

განვლილ შაბათს გაიმართა სსრ კავშირის საფეხბურთო ჩემპიონატის 23-ე ტურის მატჩები.

ახლა, როცა უმაღლესი ლიგის საკავშირო ჩემპიონატი დასასრულს უახლოვდება, ყოველ ტურში არის მეტოქეთა წყვილები, რომლებიც საგანგებო ინტერესს იწვევს. თბილისის „დინამოს“ გულშემატკივართა ყურადღება, რასაკვირველია, ვილნიუსისკენ იყო მიპყრობილი, სადაც ადგილობრივი „ჟალგირისი“ ჩვენს გუნდს ღებულობდა. ამ კონკრეტულ მატჩში რაიმე შეღავათზე ლაპარაკიც ზედმეტია, ვინაიდან ვილნიუსელმა ფეხბურთელებმა კარგად აღებული სტარტის შემდეგ რამდენადმე დათმეს და ახლა პირველი ხუთეულის მიჯნაზე იმყოფებიან. მცირე წარუმატებლობაც და გუნდი ჩამონაცვლებს იქ, საიდანაც უკვე ძნელია არა მარტო პრიზიორობის, არამედ პირველ ხუთეულში მოხვედრის შესაძლებლობაც. ამდენად, გასაგებია „ჟალგირისი“ რომ არაფერს დათმობდა, მაგრამ გასაგებია დინამოელთ ინტერესებიც, რომლებმაც მას შემდეგ, რაც კოლექტივს სათავეში ჩაუდგინნ სპორტის დამსახურებული ოსტატები დავით ყიფიანი და მურთაზ ხურცილავა, ბევრი რამ გააკეთეს უკულმა დატრიალებული საქმის წაღმა მოსაბრუნებლად. გუნდი არსებითად მთლიანად გარდაიქმნა. გადასხვაფერდა თმაშიც. შინ თუ სტუმრად აღებული ქულების მეშვეობით დინამოელებმა თანდათან მალლა აიწიეს და საგრძნობი განსხვავებით დასცილდნენ სახიფათო ზონას, სადაც უმაღლეს ლიგაში ადგილის შენარჩუნებისთვის ბრძოლაში და ჩვენს ფეხბურთელებს ძალზე საპატიო მისია უნდა შეესრულებინათ ზუსტად ისევე, როგორც მაშინ, როცა ისინი ჩემპიონობისა და თასის, ან ევროპული საკლებო ტურნირის გამარჯვებისთვის იბრძოდნენ. დაბეჭითებით შეიძლება ითქვას, რომ თბილისის დინამოელები წარმატებით იბრძვიან საბოლოო მიზნის განხორციელებისთვის და, თუმცა, საკითხი საბოლოოდ ჯერ კიდევ გადაწყვეტილი არაა, „ჟალგირისთან“ ჩატარებული მატჩი და იქ აღებული ქულები დიდად საიმედოა. არც ისაა მხედველობიდან გამოსაშვები, რომ თბილისის „დინამომ“ წლეულს პირველი გამარჯვება მოიპოვა მეტოქის მინდორზე.

ეს ორი ქულა მეტად დაძაბული ბრძოლის შემდეგ ავიღეთ. მთელი პირველი ტაიმის განმავლობაში „ჟალგირისი“ უტევდა და, რამდენიმე კონტრშეტევას თუ არ მივიღებთ მხედველობაში, დინამოელები მხოლოდ თავს იცავდნენ.

ვილნიუსელ ფეხბურთელებს არც შესვენების შემდეგ დაუკლიათ ცდა, რათ წარმატებისთვის მიეღწიათ. რამდენიმე ხელსაყრელი მომენტი შეექმნათ ივანაუსკასს, იაკუბაუსკასს, მაგრამ დინამოელთ დაცვითი ხაზები და მეკარე გაბელია წარმატებით უმკლავდებოდნენ სიძნელებს.

თამაში დასასრულს უახლოვდებოდა. დინამოელები ქულის აღების რეალური პერსპექტივის წინაშე იმყოფებოდნენ. „ჟალგირისთან“ ასეთი შედეგი ჩვენი გუნდისთვის ურიგო მაჩვენებელი არ იყო, მაგრამ 84-ე წუთზე ვილნიუსელებმა თამაშის წესი დაარღვიეს თავიანთ საჯარიმო მოედანზე და ოდესეღმა არბიტრმა ვ. ლისენკომ მათ

კარში 11-მეტრიანი დანიშნა. ამ გადამწყვეტ მომენტში დარტყმა გოგირაიშვილმა შეასრულა და ბურთი ბადეში აღმოჩნდა - 1:0.

ეს 2 ქულა მეტად მნიშვნელოვანი შენაძენია ჩვენი გუნდისთვის. ახლა მის წინაშე ახალი პერსპექტივები დაისახა. ყოველ შემთხვევაში, საბედისწერო მე-15 ადგილს უკვე 7 ქულით დავცილდით. დარწმუნებული ვართ დინამოელთ კოლექტივი მიღწეულით არ დაკმაყოფილდება, ახალ გამარჯვებებს მოიპოვებს და უმაღლეს ლიგაში დარჩენის საკითხიც მხოლოდ უსიამოვნო მოგონებადღა დაგვრჩება.

ლელი 20.09.1988